

## ÁKVÖRDUN FRAMKVÆMDASTJÓRNARINNAR

2014/EES/73/87

frá 12. maí 2010

## um breytingu á ákvörðun 2006/968/EB um framkvæmd reglugerðar ráðsins (EB) nr. 21/2004 að því er varðar leiðbeiningar og aðferðir við rafræna auðkenningu sauðfjár og geita

(tilkynnt með númeri C(2010) 3009)

(2010/280/ESB) (\*)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af reglugerð ráðsins (EB) nr. 21/2004 frá 17. desember 2003 um að koma á kerfi fyrir auðkenningu og skráningu sauðfjár og geita og breytingu á reglugerð (EB) nr. 1782/2003 og tilskipunum 92/102/EBE og 64/432/EBE <sup>(1)</sup>, einkum 1. mgr. 9. gr.,

og að teknu tilliti til eftirfarandi:

- 1) Í reglugerð (EB) nr. 21/2004 er kveðið á um að hvert aðildarríki skuli koma á kerfi fyrir auðkenningu og skráningu sauðfjár og geita í samræmi við þá reglugerð. Samkvæmt reglugerð (EB) nr. 21/2004 eru sauðfé og geitir auðkennd með fyrsta og öðru auðkennismerki. Önnur auðkenningin verður að vera rafrænt kennimerki og hin sýnilegt kennimerki.
- 2) Í ákvörðun framkvæmdastjórnarinnar 2006/968/EB <sup>(2)</sup> eru settar fram viðmiðunarreglur og aðferðir vegna samþykkis fyrir kennimerkjum og aflestrartækjum vegna rafrænnar auðkenningar á sauðfé og geitum samkvæmt reglugerð (EB) nr. 21/2004. Í þeirri ákvörðun er mælt fyrir um lágmarkskröfur sem varða tilteknar prófanir á samræmi og nothæfi vegna samþykkis fyrir þessum búnaði til að tryggja að unnt sé að lesa af rafrænu kennimerkjum í gervöllu Sambandinu og þau uppfylli lágmarksálestrarfjarlægðir eins og mælt er fyrir um í reglugerð (EB) nr. 21/2004.
- 3) Mælt er fyrir um þessar prófunaraðferðir í samræmi við aðferðir sem eru tilgreindar í alþjóðasamningnum um framkvæmd skráninga frá alþjóðlegu nefndinni um

skráningu dýra (leiðbeiningar alþjóðlegu nefndarinnar um skráningu dýra). Leiðbeiningar alþjóðlegu nefndarinnar um skráningu dýra hafa verið þróaðar frekar og nú koma ISO-staðlar 24631-1, 24631-2, 24631-3 og 24631-4 í stað þeirra. Í þágu gagnsæis skal koma á beinni tilvísun til viðeigandi liða í ISO-stöðlunum.

- 4) Hugsanlegt er að dýr verði flutt til á lífsferli sínum og haldin á mismunandi bújörðum. Nauðsynlegt er að mæla fyrir um lágmarksnothæfisviðmiðanir fyrir rafræn kennimerki, til að tryggja að unnt sé að lesa af þeim búnaði undir ólíkum kringumstæðum í gervöllu Sambandinu.
- 5) Til að draga úr mögulegri stjórnsýslubyrði skulu kröfur fyrir málsmeðferð við samþykki fyrir aflestrartækjum vera skýrar. Öfugt við það sem á við um kennimerki skal ekki mæla fyrir um bindandi kröfur fyrir álestrartæki á vettvangi Sambandsins. Hins vegar skulu aðildarríkin hafa möguleika á að setja fram viðbótarkröfur til að tryggja virkni rafrænnar auðkenningar við sérstök landfræðileg skilyrði, veðurfars- og stjórnunarskilyrði þeirra, ef nauðsyn krefur.
- 6) Fengin reynsla af innleiðingu reglugerðar (EB) nr. 21/2004 hefur sýnt að einungis þarf lítinn fjöldi rannsóknarstofa til að framkvæma allar þær prófanir sem kveðið er á um í þeirri reglugerð. Þar af leiðandi er ekki þörf á sértekri málsmeðferð til tilnefningar á landsbundnum prófunarstofum í öllum aðildarríkjum. Nægilegt er að framkvæma prófanirnar á rannsóknarstofum sem hafa fengið faggildingu vegna þessara prófana í samræmi við EN ISO/IEC-staðal 17025.
- 7) Því ber að breyta ákvörðun 2006/968/EB til samræmis við það.
- 8) Ráðstafanirnar, sem kveðið er á um í þessari ákvörðun, eru í samræmi við álit fastanefndarinnar um matvælaferlið og heilbrigði dýra.

(\*) Þessi EB-gerð birtist í Stjtið. ESB L 124, 20.5.2010, bls. 5. Hennar var getið í ákvörðun sameiginlegu EES-nefndarinnar nr. 61/2011 frá 1. júlí 2011 um breytingu á I. viðauka (Heilbrigði dýra og plantna) við EES-samninginn, sjá *EES-viðbætur við Stjórnartíðindi Evrópusambandsins* nr. 54, 6.10.2011, bls. 13.

<sup>(1)</sup> Stjtið. ESB L 5, 9.1.2004, bls. 8.

<sup>(2)</sup> Stjtið. ESB L 401, 30.12.2006, bls. 41.

SAMÞYKKT ÁKVÖRÐUN ÞESSA:

*1. gr.*

Viðaukanum við ákvörðun 2006/968/EB er breytt til samræmis við viðaukann við þessa ákvörðun.

*2. gr.*

Ákvörðun þessi gildir frá 1. júlí 2010.

*3. gr.*

Ákvörðun þessari er beint til aðildarríkjanna.

Gjört í Brussel 12. maí 2010.

*Fyrir hönd framkvæmdastjórnarinnar,*

John DALLI

*framkvæmdastjóri.*

---

## VIÐAUKI

Viðaukanum er breytt sem hér segir:

1. Í I. kafla falli f- og g-liður brott.
2. Ákvæðum II. kafla er breytt sem hér segir:
  - a) Í stað 1. og 2. liðar komi eftirfarandi:

„1. Lögbært yfirvald skal einungis samþykkja notkun kennimerkja sem hafa verið prófuð með hagstæðum niðurstöðum að því er varðar:

    - a) samræmi þeirra við ISO-staðla 11784 og 11785, í samræmi við prófunaraðferðirnar sem tilgreindar eru í 7. lið ISO-staðals 24631-1, og
    - b) frammistöðu að því er varðar lágmarksálestrarfjarlægð eins og mælt er fyrir um í 2. lið, í samræmi við aðferðirnar sem tilgreindar eru í 7. lið ISO-staðals 24631-3.
  2. Til að ná fram álestrarfjarlægðunum eins og mælt er fyrir um í c-lið 6. liðar A-þáttar viðaukans við reglugerð (EB) nr. 21/2004 skal merkissvarinn uppfylla eftirfarandi þætti:
    - a) merkissvarar með HDX-tækni skulu virkjast af segulsviðsstyrk sem nemur 1,2 A/m eða minna, mælt samkvæmt ISO-staðli 24631-3, hluta 7.6.5, „Minimal activating magnetic field strength in HDX mode“ og skulu mynda mótunarsveifluvidd sem er jafngild 10 mV, mælt samkvæmt ISO-staðli 24631-3, hluta 7.6.7, „Modulation amplitude in HDX mode“ við segulsviðsstyrk sem nemur 1,2 A/m eða minna,
    - b) merkissvarar með FDX-B-tækni skulu virkjast af segulsviðsstyrk sem nemur 1,2 A/m eða minna, mælt samkvæmt ISO-staðli 24631-3, hluta 7.6.4, „Minimal activating magnetic field strength in FDX-B mode“ og skulu mynda mótunarsveifluvidd sem er jafngild 10 mV, mælt samkvæmt ISO-staðli 24631-3, hluta 7.6.6, „Modulation amplitude in FDX-B mode“ við segulsviðsstyrk sem nemur 1,2 A/m eða minna.“
  - b) Eftirfarandi 6. liður bætist við:

„6. Samþykki, sem lögbæra yfirvaldið hefur veitt til og með 30. júní 2010 fyrir kennimerkjum, sem eru prófuð í samræmi við aðferðir til að samþykkja kennimerki, sem gilda til þessa dags skulu gilda áfram.“
3. Í stað III. og IV. kafla komi eftirfarandi:

## „III. KAFLI

**Aflestrartæki**

Til að tryggja réttan aflestur kennimerkja við staðbundin landfræðileg skilyrði, veðurfars- og/eða stjórnunarskilyrði má lögbæra yfirvaldið, ef nauðsyn krefur, setja sérstakar nothæfisviðmiðanir fyrir aflestrartæki sem eru notuð á tiltekinni bújörð eða á tiltekinni tegund bújarða. Líklegt er að stjórnunarskilyrði sem réttlæta slíkar nothæfisviðmiðanir ríki á bújörðum þar sem er mikið gegnumstreymi dýra sem eru merkt með kennimerkjum sem nota HDX- og FDX-B-tæknina og/eða á bújörðum þar sem samstillingar aflestrartækja er krafist samkvæmt lið 7.7.3 í ISO-staðli 24631-2.

## IV. KAFLI

**Prófunarstofur og aðferð**

Prófanirnar sem tilgreindar eru í 1.–4. lið II. kafla skal framkvæma á prófunarstofum sem starfa og hafa verið metnar og hlotið faggildingu í samræmi við EN/ISO/IEC 17025, „Almennar kröfur varðandi hæfni prófunar- og kvörðunarstofa“. Framleiðendum kennimerkja sem sækja um prófanir er heimilt að velja á milli prófanastofa sem hafa hlotið faggildingu.“